



Sumáriu Kazu
Tribunál Distritál Oe-Cusse
Períodu Dezembru 2017

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Oe-Cusse

1. Totál kazu ne'ebé JSMP monitoriza: 12

Tipu kazu	Tipu kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	4
Artigu 316 (KP)	Krime kontrabandu	5
Artigu 207 (KP)	Kondusaun sein karta	3
Totál	12	12

2. Totál desizaun ne'ebé JSMP monitoriza : 12

Tipu desizaun	Númeru
Pena prizaun tuir artigu 66 Kódigu Penál	1
Suspensaun ba pena prizaun nia ezekusaun - Artigu 68 KP	7
Pena multa tuir artigu 67 hosi Kódigu Penál	4
Totál	12

B. Deskripsaun sumáriu julgamentu ba desizaun kazu sira

1. Krime kondusaun sein karta

Nú. Prosesu : 0031/17.OESTR
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Pena multa

Iha 01 Dezembru 2017, Tribunál Distritál Oe-Cusse prezide julgamentu leitura sentensa ba krime kondusaun sein karta ne'ebé envolve arguidu Januario Elu hasoru Estadu RDTL, iha Suku Costa, Sub-distritu Pante-makassar, Distritu Oe-Cusse.

Akuzasaun Prokuradór

Prokuradór akuza katak iha 23 Juñu 2017, maizumenus iha tuku 14:00 lokraik, arguidu lori motor iha dalan públiku no la iha xapa matrikula. Wainhira polisia pasa revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklarara katak arrepende ona nia hahalok no foin primeira-vez mai hatan iha Tribunál. Arguidu konsiente katak hahalok hanesan ne'e ladiak no kontra lei Timor no arguidu hanesan agrikultór no laiha rendimentu fiksi.

Prokuradór husu ba Tribunál atu prezinde testemuña nia depoimentu ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun final

Prokuradór haktuir katak arguidu provadu komete krime kondusaun sein karta tanba arguidu rasik konfesa faktus hotu iha akuzasaun no kada fulan kazu ne'e sempre akontese no rejista aas iha Regiaun Oe-Cusse. Tanba ne'e husu ba Tribunál aplika pena multa ba arguidu bazeia ba artigu 207 Kódigu Penál.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no foin primera-vez mai hatan iha Tribunál. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Bazeia ba faktus sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$60.00 no sei selu 0.50 sentavus kada liron durante liron 120. Tribunál mós fiksa pena alternativa durante liron 80 prizaun, wainhira arguidu la kumpri pena multa ne'e.

2. Krime kondusaun sein karta

Nú. Prosesu : 562/17.PDOEC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Calisto Tout
Tipu pena : Pena multa

Iha 06 Dezembru 2017, Tribunál Distritál Oe-Cusse prezide julgamentu leitura sentensa ba krime kondusaun sein karta ne'ebé envolve arguidu Tito E. Elo hasoru Estadu RDTL, iha Suku Costa, Sub-distritu Pante-makassar Distritu Oe-Cusse.

Akuzasaun Prokuradór

Prokuradór akuza katak iha 04 Dezembru 2017, maizumenus iha tuku 08:30 dader, arguidu lori motor iha dalan públiku husi Mahata atu ba Oesono. Wainhira polisia pasa revista no hetan katak arguidu laiha karta kondusaun.

Prokuradór akuza arguidu kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova

Iha julgamentu arguidu konfesa faktus hotu iha akuzasaun, arguidu mós deklara katak arrepende ona nia hahalok no foin primeira-vez mai hatan iha Tribunál. Arguidu hatutan tan katak hahalok hanesan ne'e ladiak no kontra lei Timor no arguidu hanesan estudante.

Prokuradór husu ba Tribunál atu prezinde testemuña nia depoimentu ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór haktuir katak arguidu provadu komete krime kondusaun sein karta, tanba arguidu konfesa faktus hotu iha akuzasaun no kazu ne'e sempre akontese no rejista aas iha Regiaun Oe-Cusse. Tanba ne'e husu ba Tribunál aplika pena multa ba arguidu bazeia ba artigu 207 Kódigu Penál.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok, arguidu hanesan estudante no laiha rendimentu fiksi kada fulan. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Bazeia ba faktus sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$60.00 no sei selu 0.50 sentavus kada loran durante loran 120. Tribunál mós fixa pena alternativa durante loran 80 prizaun, wainhira arguidu la kumpri pena multa ne'e.

3. Krime ofensa ba integridade fizika simples ho natureza violénsia doméstik

Nú. Prosesu : 0223/17.OESIC

Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nessi
Defeza : Dr. Marcelino Marques Coro
Tipu pena : Pena prizaun efetiva tinan 2 fulan 6¹

Iha 14 Dezembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MB hasoru nia feen MA, iha Distritu Oe-Cusse.

Akuzasaun Prokuradór

Prokuradór akuza katak iha 11 Dezembru 2017, maizumenus iha tuku 15:00 lokraik, arguidu lori katana nia belar baku dala 1 iha lezada nia kotuk laran no katana nia tutun kona kois iha lezada nia liman sikun karuk no rezulta kanek kiik no ran iha lezada nia liman sikun no bubu iha lezada nia kotuk laran. Kazu ne'e anexa mós ho relatoriu mediku husi Pradet no fotografia husi Polisia-VPU.

Prokuradór akuza arguidu kontra artigu 145 Kódigo Penál kona-ba ofensa ba integridade fizika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD no 36 kona-ba krime sira violénsia doméstika nian hanesan krime públiku.

Produsaun ba prova

Iha julgamentu arguidu konfesa faktus hotu iha akuzasaun, arguidu mós deklara katak arrepende ona nia hahalok. Arguidu mós deklara katak antes ne'e arguidu komete ona krime hasoru nia feen no hetan pena suspensaun. Arguidu promete katak sei la komete tan krime hasoru nia feen ka ema seluk iha futuru, no seidauk diak malu ho lezada. Aleinde ne'e lezada mós konfirma no kontinua reforsa faktus sira iha akuzasaun.

Alegasaun final

Prokuradór konsidera arguidu provadu komete krime violénsia doméstika hasoru nia feen, tanba arguidu konfesa faktus hotu iha akuzasaun no arguidu laiha arrependementu ba nia hahalok ne'ebé akontese iha pasadu tanba iha tinan 2014 arguidu komete krime hasoru nia feen no Tribunál kondena ho pena suspensaun. Aleinde ne'e, iha Mei 2017 arguidu kontinua repete ninia hahalok ne'e, no Tribunál kondena ona arguidu ho pena prizaun 1 suspende ba tinan 1 fulan 6 maibé arguidu kontinua komete fali krime foun iha períodu suspensaun nia laran. Tanba ne'e husu ba Tribunál atu revoga tiha suspensaun ne'e no aplika pena prizaun efetiva tinan 2 ba arguidu.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok, tanba ne'e husu ba Tribunál atu aplika pena suspensaun ba arguidu maibé ho kondisaun

¹ Favor lee Komunikadu Imprensa JSMP kona-ba kazu ne'e iha:

http://jsmp.tl/wpcontent/uploads/2018/01/PrTribunalOECUSSERevogaPenaSuspensaun_TETUM.pdf

kada fulan arguidu apresenta an iha polisia. Maibé se Tribunál iha hanoin seluk husu ba Tribunál atu fó justisa ba arguidu.

Desizaun

Depoizde avalia faktus provadu sira ne'ebé produz durante julgamentu, Tribunál konklui prosesu ne'e no revoga tiha suspensaun ne'ebé aplika ba arguidu iha kazu antes no kondena arguidu ho pena prizaun efetiva tinan 2 fulan 6 tanba provadu komete krime iha períodu suspensaun nia laran no la arrepende ba hahalok ne'ebé nia komete ona. Pena ne'e nu'udar akumulasaun hosi pena tinan 1 ba kazu ne'ebé Tribunál decide no kondena ona iha 23 Maiu 2017 no kazu atuál ho pena prizaun tinan 1 fulan 6.

4. Krime ofensa ba integridade fízika simples ho natureza violénsia doméstika

Nú. Prosesu : 0136/16.OESIC
Kompozisaun Tribunál : Singulár
Juis : Dr. João Ribeiro
Prokuradór : Dr. Mateus Nesi
Defeza : Dr. Marcelino Marques Coro
Tipu pena : Pena prizaun tinan 2 suspende ba tinan 2

Iha 18 Dezembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AN hasoru nia feen (MO) no oan (EN), iha Distritu Oe-Cusse.

Akuzasaun Prokuradór

Prokuradór akuza katak iha 13 Jullu 2016, maizumenus iha tuku 01.00 madrugada, arguidu basa arguidu ninia feen (MO) nia oin dala 1 no baku dala 1 iha hasan. Tanba ne'e lezada EN rona nia inan tanis no EN halai ba atu satan ka hafahe sira, maibé hetok arguidu mós basa dala 1 iha lezada nia hasan karuk no kauza lezada nain rua sofre moras. Kazu ne'e anexa mós ho relatóriu médiku husi Pradet no fotografía husi Polisia-VPU.

Prokuradór akuza arguidu kontra artigu 145 Kódigo Penál kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu arguidu konfesa faktus hotu iha akuzasaun, arguidu mós deklarara katak arrepende ona nia hahalok no foin primeira-vez mai hatan iha Tribunál. Arguidu hatutan tan katak servisu hanesan negociante kiik ho rendimentu kada fulan US\$20.00 no iha oan nain 5. Arguidu promete iha futuru sei la komete tan krime hasoru lezada ka ema seluk no depoizde akontese sira diak malu kedas.

Prokuradór husu ba Tribunál atu prezinde lezada nain 2 nia deklarasaun ne'ebé antes ne'e Prokuradór arola ona atu rona tanba arguidu konfesa faktus hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada. Aleinde ne'e kazu violénsia doméstika barak mak akontese iha Oe-Cusse kompara ho distritu sira seluk. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no promete sei la komete tan krime hasoru lezada no ema seluk iha futuru. Tanba ne'e husu ba Tribunál atu aplika pena ne'ebé kmaan ba arguidu tuir nia sala.

Desizaun

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 2 suspende ba tinan 2.

5. Krime kondusaun sein karta

Nú. Prosesu Sumariu	: 0587/17.PDOEC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Marcelino Marques Coro
Tipu pena	: Pena multa

Iha 18 Dezembru 2017, Tribunál Distritál Oe-Cusse prezide julgamentu leitura sentensa ba krime kondusaun sein karta ne'ebé envolve arguidu Efigenio Quenta, Deonizio Abi, Orlando Cab, Calisto de Oliveira no Moezes Colo hasoru Estado RDTL, iha Suku Costa, Sub-distritu Pante-makassar Distritu Oe-Cusse.

Akuzasaun Prokuradór

Prokuradór akuza katak iha 15 Dezembru 2017, maizumenus iha tuku 11:30 dader, arguidu sira lori motor iha dalan públiku husi Lifau atu ba Palaban. Wainhira polisia pasa revista no hetan katak arguidu sira laiha karta kondusaun.

Prokuradór akuza arguidu sira kontra artigu 207 Kódigu Penál kona-ba krime kondusaun sein karta ho moldura penál too tinan 2 ka multa.

Produsaun ba prova

Iha julgamentu arguidu sira konfesa faktus hotu iha akuzasaun. Arguidu sira mós deklara katak arrepende ona sira nia hahalok no foin primeira-vez mai hatan iha Tribunál no konsiente katak hahalok hanesan ne'e ladiak no kontra lei Timor nian. Arguidu Deonizio Abi hanesan funsionariu seguransa PAX ho rendimentu kada fulan US\$150.00 no argudu sira seluk hanesan estudante iha sekundáriu no laiha rendimentu fiksi.

Prokuradór husu ba Tribunál atu prezinde testemuña nia depoimentu ne'ebé antes ne'e Prokuradór arola ona atu rona tanba arguidu sira konfesa faktus hotu iha akuzasaun.

Alegasaun final

Prokuradór konsidera arguidu sira provadu komete krime kondusaun sein karta, tanba arguidu sira konfesa faktus hotu iha akuzasaun no kada fulan kazu ne'e sempre akontese no rejista aas

iha Regiaun Oe-Cusse. Tanba ne'e husu ba Tribunál aplika pena multa ba arguidu sira, tuir artigu 207 Kódigu Penál.

Enkuantu Defeza haktuir katak arguidu sira konfesa faktus hotu iha akuzasaun, arrepende ona sira nia hahalok. Maske arguidu Deonizio Abi hanesan funsionariu seguransa PAX ho rendimentu kada fulan \$150.00, maibé arguidu sira seluk hanesan estudante sekundáriu laiha rendimentu fiksi. Tanba ne'e husu ba Tribunál atu aplika pena ne'ebé adekuaudu ba kada arguidu tuir ida-dak nia sala.

Desizaun

Bazeia ba faktus ne'ebé produs durante julgamentu, Tribunál konklui prosesu ne'e no kondena arguidu Efiganio Quenta, Orlando Cab, Calistro de Oliveira no Moizes Colo ho pena multa US\$60.00 no sei selu 0.50 sentavus kada loran durante loran 120. Enkuantu arguidu Deonizio Abi, Tribunál kondena ho pena multa US\$120.00 no sei selu kada loran US\$1.00 durante loran 120. Tribunál mós fiksa pena alternativa durante loran 80 prizaun, wainhira arguidu sira la kumpri pena multa ne'e.

6. Krime ofensa ba integridade fízika simples ho natureza violénsia doméstika

Nú. Prosesu	: 0004/17.OEPMK
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 1 suspende ba tinan 1 fulan 6

Iha 19 Dezembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FF hasoru nia inan, iha Distritu Oe-Cusse.

Akuzasaun Prokuradór

Prokuradór akuza katak iha 03 Janeiru 2017, maizumenus iha tuku 16.00 lokraik, arguidu basa dala 1 iha lezada nia hasan karuk, tebe dala 1 iha lezada nia kotuk laran no rezulta lezada monu ba rai. Kazu ne'e akontese tanba arguidu haruka lezada atu sosa motor maibé lezada lakohi. Kazu ne'e anexa mós ho relatóriu médiiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun ba prova

Iha julgamentu arguidu konfesa faktus hotu iha akuzasaun, arguidu mós deklara katak arrepende ona nia hahalok no foin primeira-vez mai hatan iha Tribunál. Arguidu servisu hanesan agrikultór no laiha rendimentu fiksi, promete katak sei la komete tan krime hasoru lezada no ema seluk iha futuro, deposing akontesementu ne'e arguidu diak malu kedas ho lezada.

Prokuradór husu ba Tribunál atu prezinde lezada nia deklarasaun ne'ebé antes ne'e Prokuradór arola ona atu rona tanba arguidu sira konfesa faktus hotu iha akuzasaun.

Alegasaun final

Prokuradór konsidera arguidu provadu komete krime hasoru nia inan tuir faktus hotu iha akuzasaun no konfisaun hosi arguidu. Prokuradór reforsa tan katak lezada hanesan arguidu nia inan rasik tuir lolos arguidu tenke respeita, maibé arguidu mak baku fali nia inan ne'ebé mak kuidadu ona arguidu husi kiik too bo'ot. Tanba ne'e husu ba Tribunál atu aplika pena tuir artigu 145 Kódigu Penál.

Enkuantu Defeza haktuir katak arguidu konfesa faktus hotu iha akuzasaun, arrepende ona nia hahalok no diak malu ona ho lezada no foin primeira-vez mai hatan iha Tribunál. Tanba ne'e husu ba Tribunál atu aplika pena ne'ebé kmaan ba arguidu tuir nia sala.

Desizaun

Depoide avalia faktus provadu sira ne'ebé produz durante julgamentu, Tribunál konklui prosesu ne'e no kondena arguidu ho pena prizaun tinan 1 suspende ba tinan 1 fulan 6.

7. Krime ofensa ba integridade física simples ho natureza violência doméstica

Nú. Prosesu	: 0096/17.OESIC
Kompozisaun Tribunál	: Singulár
Juis	: Dr. João Ribeiro
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena multa

Iha 19 Dezembru 2017, Tribunál Distritál Oe-Cusse prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu DFN (membro polisia) hasoru nia feen, iha Distritu Oe-Cusse.

Akuzasaun Prokuradór

Prokuradór akuza katak iha 08 Maiu 2017, maizumenus iha tuku 11:00 dader, arguidu buti dala 1 iha lezada nia kakorok no basa dala 2 iha lezada nia hasan karuk. Arguidu kontinua foti ai-sanak tuda ba lezada maibé lakona lezada tanba lezada halai tiha. Kazu ne'e anexa mós ho relatóriu médiku husi Pradet no fotografia husi Polisia-VPU.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 no artigu 35 letra (b) LKVD.

Produsaun prova

Iha julgamentu arguidu deklara katak basa deit dala 1 iha lezada nia hasan karuk no la buti lezada nia kakorok. Arguidu mós deklara katak arrepende ona nia hahalok no foin primeira-vez mai hatan iha Tribunál, arguidu hanesan membru PNTL ho vensimentu kada fulan US\$241.00 no arguidu iha oan nain 3. Depoide akontesementu ne'e diak malu kedas ho lezada. Iha parte seluk lezada kontinua konfirma no reforsa faktus sira iha akuzasaun.

Alegasaun finál

Prokuradór konsidera arguidu provadu komete krime hasoru nia feen tuir faktus hotu iha akuzasaun. Prokuradór reforsa tan katak arguidu hanesan membru PNTL tuir lolos arguidu mak proteze lezada tanba arguidu hatene diak lei. Tanba ne'e husu ba Tribunál atu aplika pena tuir artigu 145 KP.

Enkuantu Defeza haktuir katak arguidu deklaradeit faktus ne'ebé nia komete, arrepende ona nia hahalok, foin primeira-vez mai hatan iha Tribunál no diak malu ona ho lezada. Tanba ne'e husu ba Tribunál atu aplika pena ne'ebé kmaan ba arguidu tuir nia sala.

Desizaun

Depoizde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$90.00 no sei selu US\$1.00 kada loron durante loron 90. Tribunál mós fixa pena alternativa durante loron 60 prizaun, wainhira arguidu la kumpri pena multa ne'e no selu mós kustu judicial US\$20.00.

8. Krime kontrabandu

Nú. Prosesu	: 0129/16.OESIC
Kompozisaun Tribunál	: Kolektivu
Juis	: Dr. João Ribeiro
	: Dra. Zulmira Barros da Silva
	: Dr. Eusebio Victor Xavier
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 2 suspende ba tinan 2

Iha 21 Dezembru 2017, Tribunál Distritál Oe-Cusse prezide julgamentu leitura akordaun ba krime kontrabandu ne'ebé envolve arguidu Sebastião Caet hasoru Estadu RDTL, iha Suku Bobometo, Sub-distritu Oesilo Distritu Oe-Cusse.

Akuzasaun Prokuradór

Prokuradór akuza katak iha 04 Jullu 2016, maizumenus iha tuku 09:30 dader, arguidu hatama sasan ilegal liu hosi fronteira Oesilo. Sasan ne'ebé arguidu hatama hanesan gazolina ho gazoel masa litru 5 nian hamutuk 13.

Prokuradór akuza arguidu kontra artigu 316 Kódigu Penál kona-ba krime kontrabandu ho moldura penal tinan 2 to'o tinan 6 ka multa.

Produsaun ba prova

Iha julgamentu, arguidu konfesa faktus hotu iha akuzasaun, arrepende ona nia hahalok. Arguidu deklaradeit katak depoizde akontesementu ne'e arguidu hakarak selu fali taxa ba Diresaun Alfandega maibé hosi Diresaun Alfandega hakarak prosesu iha Tribunál hotu mak bele selu taxa. Arguidu nu'udar to'os-nain, laiha rendimentu fíksu kada fulan no promete sei larepete tan hahalok ne'e iha futuru no arguidu iha oan nain 2.

Prokuradór husu ba Tribunál atu prezindi testemuña hosi Unidade Polisia Fronteira (UPF) nia depoimentu tanba arguidu konfesa faktus hotu iha akuzasaun. Iha parte seluk Defeza konkorda ho pedidu ne'e.

Alegasaun finál

Prokuradór konsidera arguidu provadu komete krime kontrabandu hasoru estadu no krime kontrabandu barak mak akontese iha Regiaun Oe-Cusse hodi hamosu prejuizu ba Estadu. Tanba ne'e husu ba Tribunál atu kondena arguidu tuir pena ne'ebé hakerek ona iha artigu 316 Kódigu Penál atu nune'e arguidu la repete tan hahalok hanesan iha futuru.

Enkuantu Defeza haktuir katak iha produsaun ba prova arguidu konfesa faktus hotu iha akuzasaun, arrepende ona nia hahalok no promete la repete tan hahalok hanesan iha futuru. Defeza mós reforsa deklarasaun arguidu nian katak antes julgamentu arguidu tenta atu selu fali taxa ba iha Alfandega maibé hosi parte Diresaun Alfandega hakarak prosesu hotu iha Tribunál mak bele selu taxa. Arguidu nu'udar to'os nain no laiha rendimentu fiksi. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Tribunál prova katak arguidu komete duni krime tuir faktus hosi akuzasaun. Bazeia ba faktus provadu hirak-ne'e, Tribunál kondena arguidu ho pena prizaun tinan 2 suspende ba tinan 2.

9. Krime kontrabandu

Nú. Prosesu	: 0059/16.OESIC
Kompozisaun Tribunál	: Kolektivu
Juis	: Dr. João Ribeiro
	: Dra. Zulmira Barros da Silva
	: Dr. Eusebio Victor Xavier
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 2 suspende ba tinan 2 ba kada arguidu no arguida

Iha 21 Dezembru 2017, Tribunál Distritál Oe-Cusse prezide julgamentu leitura akordaun ba krime kontrabandu ne'ebé envolve arguidu António Elu, Maria Ili hasoru Estadu RDTL, iha Suku Bobometo, Sub-distritu Oesilo, Distritu Oe-Cusse.

Akuzasaun Prokuradór

Prokuradór akuza katak iha 02 Abril 2016, maizumenus iha tuku 14:30 madrugada, arguidu/a hatama sasan ilegal liu hosi fronteira Oesilo. Sasan ne'ebé arguidu/a hatama mak hanesan gasolina jerigen litru 5 hamutuk 102.

Prokuradór akuza arguidu/a kontra artigu 316 Kódigu Penál kona-ba krime kontrabandu ho moldura penal tinan 2 to'o tinan 6 ka multa.

Produsaun ba prova

Iha julgamentu, arguidu/a sira konfesa faktus hotu iha akuzasaun no arrepende ona sira nia hahalok. Arguidu/a sira deklara katak depoisde akontesementu ne'e arguidu/a sira hakarak selu

taxa ba Dirasaun Alfandega maibé hosi Dirasaun Alfandega hakarak prosesu iha Tribunál hotu mak bele selu taxa no arguidu sira hatete katak hahalok hanesan ne'e ladiak no kontra lei Timor. Arguidu/a sira nu'udar to'os nain, laiha rendimentu fiksi kada fulan no promete sei la repete hahalok ne'e iha futuru.

Prokuradór husu ba Tribunál atu prezindi testemuña hosi Unidade Polisia Fronteira (UPF) nia depoimentu tanba arguidu/a sira konfesa toalemnte faktus hotu-hotu iha akuzasaun. Iha parte seluk Defeza konkorda ho pedidu ne'e.

Alegasaun final

Prokuradór konsidera arguidu/a sira provadu komete krime kontrabandu, tanba arguidu/a sira konfesa faktus hotu iha akuzasaun. Prokuradór mós konsidera katak kazu krime kontrabandu barak mak akontese iha Regiaun Oe-Cusse hodi hamosu prejuizu ba estadu. Tanba ne'e husu ba Tribunál atu aplika pena ne'ebé hakerek ona iha artigu 316 Kódigu Penál atu nune'e iha futuru arguidu/a sira la repete tan hahalok ne'e.

Defeza husu ba Tribunál atu kondena arguidu/a sira ho pena ne'ebé adekuaadu, tanba arguidu/a sira konfesa faktus hotu iha akuzasaun, arrepende ona sira nia hahalok no promete iha futuru sei la repete tan hahalok ne'e.

Defeza mós haktuir tan katak depoisde akontesementu ne'e arguidu/a hakarak selu taxa ba Dirasaun Alfandega maibé hosi Dirasaun Alfandega hakarak prosesu iha Tribunál hotu mak bele selu taxa.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu/a ho pena prizaun tinan 2 suspende ba tinan 2. Tribunál deside devolve fali sasan ne'ebé prende ba arguidu/a sira tanba Tribunál konsidera katak sasan hirak ne'e sei la hamosu krime seluk iha futuru no arguidu sira hakarak selu fali taxa ba Estadu RDTL liuhosi Dirasaun Alfandega.

10. Krime kontrabandu

Nú. Prosesu	: 0107/16.OESIC
Kompozisaun Tribunál	: Kolektivu
Juis	: Dr. João Ribeiro
	: Dra. Zulmira Barros da Silva
	: Dr. Eusebio Victor Xavier
Prokuradór	: Dr. Mateus Nesi
Defeza	: Dr. Calisto Tout
Tipu pena	: Pena prizaun tinan 2 suspende ba tinan 2 ba kada arguidu

Iha 21 Dezembru 2017, Tribunál Distritál Oe-Cusse prezide julgamentu leitura akordaun ba krime kontrabandu ne'ebé envolve arguidu Filares Neno, Silberto Babo, Serafin Oki, Lucas ase, Leonardo Saco no Agostinho Saco hasoru Estadu RDTL, iha Suku Bobometo, Sub-distritu Oesilo Distritu Oe-Cusse.

Akuzasaun Prokuradór

Prokuradór akuza katak iha 07 Juñu 2016, maizumenus iha tuku 17:00 loraik, arguidu sira hatama sasan ilegal liu hosi fronteira Oesilo. Sasan sira ne'ebé arguidu sira hatama mak hanesan gazolina litru 390, minarai litru 105 no gazoel litru 60.

Prokuradór akuza arguidu sira kontra artigu 316 Kódigu Penál kona-ba krime kontrabandu ho moldura penal tinan 2 to'o tinan 6 ka multa.

Produsaun ba prova

Arguidu sira konfesa faktus hotu iha akuzasaun, deklara katak arrepende ona sira nia hahalok no promete katak sei la repete tan hahalok hanesan ne'e iha futuru. Arguidu sira hatutan katak deposite akontesementu ne'e sira hakarak selu taxa ba Dirasaun Alfandega maibé hosi Dirasaun Alfandega hakarak prosesu iha Tribunál hotu mak bele selu taxa.

Prokuradór husu ba Tribunál atu prezindi testemuña hosi Unidade Polisia Fronteira (UPF) nia depoimentu ne'ebé antes ne'e Prokuradór apresenta ona ba Tribunál tanba arguidu konfesa faktus hotu iha akuzasaun. Aleinde ne'e, Defeza mós konkorda ho pedidu ne'e.

Alegasaun final

Prokuradór konsidera arguidu provadu komete krime kontrabandu ne'ebé dala barak ona akontese iha Oe-Cusse. Tanba ne'e husu ba Tribunál atu aplika pena tuir artigu 316 Kódigu Penál atu nune'e iha futuru arguidu sira la repete hahalok ne'e.

Enkuantu Defeza haktuir katak arguidu sira konfesa faktus hotu iha akuzasaun, arrepende ona sira nia hahalok no kolabora diak ho Tribunál. Tanba ne'e husu ba Tribunál atu kondena arguidu ho pena ne'ebé adekuadu.

Desizaun

Tribunál prova katak arguidu sira komete duni krime tuir faktus hosi akuzasaun. Bazeia ba faktus provadu hirak-ne'e, Tribunál kondena arguidu sira ho pena prizaun tinan 2 suspende ba tinan 2 ba kada arguidu. Tribunál mós decide devolve fali sasan ne'ebé prende hela ba arguidu sira tanba Tribunál konsidera katak sasan hirak ne'e sei la hamosu krime seluk iha futuru.

11. Krime kontrabandu

Nú. Prosesu	: 0123/16.OESIC
Kompozisaun Tribunál	: Kolektivu
Juis	: Dr. João Ribeiro : Dra. Zulmira Barros da Silva : Dr. Eusebio Victor Xavier
Prokuradór	: Dr. Mateus Nesi
Defeza	: Dr. Daniel Elu (Advogadu Privadu)
Tipu pena	: Pena prizaun tinan 2 maibé izensaun ba pena

Iha 22 Dezembru 2017, Tribunál Distritál Oe-Cusse prezide julgamentu leitura akordaun ba krime kontrabandu ne'ebé envolve arguidu Gaspar Infein hasoru Estadu RDTL, iha Suku Bobometo, Sub-distrito Oesilo, Distritu Oe-Cusse.

Akuzasaun Prokuradór

Prokuradór akuza katak iha 06 Jullu 2016, maizumenus iha tuku 20:55 kalan, arguidu hatama sasan ilegal liu hosi fronteira Oesilo, hanesan; oli mesran kor mean 10, mina rem masa 4, pentar 2T kor kinur 20, Oli MPXAM 5, stater stil 2, gagan rem 10, tali gas motor 9, kertar panking 3, STILH kor mutin 4, korente sensor 2, spul api 1, piston kit 4, platina sensor 5, fer stater motor 3, gir masa 2, sarum tempat duduk 4, ho bintang sensor still 4.

Prokuradór akuza arguidu kontra artigu 316 Kódigu Penál kona-ba krime kontrabandu ho moldura penal tinan 2 to'o tinan 6 ka multa.

Produsaun ba prova

Iha julgamentu, arguidu konfesa faktus hotu iha akuzasaun, arguidu mós deklarata katak arrepende ona nia hahalok. Arguidu mós deklarata katak depoisde akontesementu ne'e selu ona taxa ba Dirasaun Alfandega no arguidu hatene katak hahalok hanesan ne'e ladiak no kontra lei Timor. Arguidu servisu hanesan negosiante kiik ho rendimentu kada fulan US\$20.00 no promete iha futuru sei la repete tan hahalok ne'e no arguidu iha oan nain 4.

Prokuradór husu ba Tribunál atu prezindi testemuña hosi Unidade Polisia Fronteira (UPF) nia depoimentu ne'ebé antes ne'e Prokuradór apresenta ona ba Tribunál tanba arguidu konfesa faktus hotu iha akuzasaun. Iha parte seluk Defeza konkorda ho pedidu ne'e.

Alegasaun final

Prokuradór konsidera arguidu provadu komete krime kontrabandu no krime ne'e akontese barak iha Oe-Cusse, tanba ne'e husu ba Tribunál atu aplika pena ne'ebé hakerek ona iha artigu 316 Kódigu Penál.

Defeza haktuir katak arguidu konfesa faktus hotu iha akuzasaun, arrepende ona nia hahalok no depoisde akontesementu ne'e selu ona taxa ba Dirasaun Alfandega. Arguidu kolabora diak ho Tribunál no servisu hanesan negosiante kiik ho rendimentu kada fulan \$20.00 no iha oan nain 4. Tanba ne'e husu ba Tribunál aplika pena ne'ebé adekua ba arguidu tuir nia sala.

Desizaun

Depoisde avalia faktus provadu sira ne'ebé produz durante julgamentu, Tribunál bazeia artigu 28 KP kona-ba arrendementu posterior² no 318 KP kona-ba izensaun ba pena³ konklui prosesu ne'e no kondena arguidu ho pena prizaun tinan 2 maibé Tribunál decide atu halo izensaun ba pena ne'e tanba arguidu selu ona taxa ba estadu.

12. Krime kontrabandu

Nú. Prosesu : 0126/16.OESIC
Kompozisaun Tribunál : Kolektivu
Juis : Dr. João Ribeiro

² Artigu 28 KP kona-ba arrendementu posteriór defini katak: iha krime ne'ebé laiha violénsia ka ameasa grave hasoru ema, pena sei hetan atenuasaun extraordinária ka, tuir sirkunstánsia, ajente sei hetan izensaun ba pena, kuandu danu repara tiha ona, koiza restitui tiha ona ka situasaun legaliza tiha ona molok iha partisipasaun ka autoridade kompetente simu denúnsia ka keixa.

³ Artigu 318 KP kona-ba Izensaun ba pena, define katak: Ajente ne'ebé pratika faktu sira deskritu iha artigu anteriór sira bele hetan izensaun ba pena kuandu nia selu voluntariamente direitu ka taxa alfandegária ne'ebé sei likida no nia konduta ne'e okazonál de'it.

Prokuradór : Dra. Zulmira Barros da Silva
Defeza : Dr. Eusebio Victor Xavier
Tipu pena : Dr. Mateus Nesi
: Dr. Marcelino Marques Coro
: Pena prizaun tinan 2 suspende ba tinan 2

Iha 26 Dezembru 2017, Tribunál Distritál Oe-Cusse prezide julgamentu leitura akordaun ba krime kontrabandu ne'ebé envolve arguidu Antonio Eko hasoru Estadu RDTL, iha Suku Bobometo, Sub-distritu Oesilo Distritu Oe-Cusse.

Akuzasaun Prokuradór

Prokuradór akuza katak iha 06 Jullu 2016, maizumenus iha tuku 16:30 loraik, arguidu hatama sasan ilegal liu hosi fronteira Oesilo, hanesan motorizada 1 modelu bebek marka Honda supra X 125Cc, ne'ebé arguidu sosa husi ema Indonezia.

Prokuradór akuza arguidu kontra artigu 316 Kódigu Penál kona-ba krime kontrabandu ho moldura penal tinan 2 to'o tinan 6 ka multa.

Produsaun ba prova

Iha julgamentu, arguidu konfesa faktus hotu iha akuzasaun no deklara katak arrepende ona nia hahalok. Arguidu mós deklara katak depoisde akontesementu ne'e hakarak selu taxa ba Dirasaun Alfandega maibé hosi Dirasaun Alfandega hakarak prosesu iha Tribunál hotu mak bele selu taxa no arguidu hatene katak hahalok hanesan ne'e ladiak no kontra lei Timor. Arguidu nu'udar to'os nain, laiha rendimentu fiksi kada fulan no promete iha futuru sei la repete hahalok ne'e.

Prokuradór husu ba Tribunál atu prezindi testemuña hosi Unidade Polisia Fronteira (UPF) nia depoimentu ne'ebé antes ne'e Prokuradór apresenta ona ba Tribunál tanba arguidu konfesa faktus hotu iha akuzasaun. Iha parte seluk Defeza konkorda ho pedidu ne'e.

Alegasaun final

Prokuradór konsidera arguidu provadu komete krime kontrabandu no krime kontrabandu barak liu akontese iha Regiaun Oe-Cusse hodi hamosu prejuizu ba estadu. Tanba ne'e husu ba Tribunál atu aplika pena ne'ebé hakerek ona iha artigu 316 Kódigu Penál atu nune'e iha futuru arguidu la repete tan hahalok ne'e.

Defeza husu ba Tribunál atu kondena arguidu ho pena ne'ebé adekua, tanba arguidu konfesa faktus hotu iha akuzasaun, arrepende ona nia hahalok no promete iha futuru sei la repete tan hahalok ne'e. Defeza mós haktuir tan katak depoisde akontesementu ne'e arguidu hakarak selu taxa ba Dirasaun Alfandega maibé hosi Dirasaun Alfandega hakarak prosesu iha Tribunál hotu mak bele selu taxa.

Desizaun

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 2 suspende ba tinan 2. Tribunál mós deside devolve fali sasan ne'ebé prende hela ba arguidu, tanba Tribunál konsidera katak sasan hirak ne'e sei la hamosu krime seluk iha futuru.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl